



জেলা পরিক্রমা কালকিনি

মাদারীপুর, ২৯ মার্চ (সংবাদদাতা)।— মাদারীপুর জেলা সদর থেকে ১৪ মাইল দক্ষিণে অবস্থিত কালকিনি উপজেলা। আয়তন ১১০ বর্গমাইল। লোকসংখ্যা ২ লাখ ৩৪ হাজার ৮৯৬ জন। থানা থেকে উপজেলায় উন্নীত হলেও এ উপজেলায় বিদ্যুৎ, যোগাযোগ, শিক্ষা, স্বাস্থ্য, হাট-বাজার প্রতি ক্ষেত্রে তেমন কোন উন্নতি হয়নি।

শিক্ষা
এ উপজেলায় ৩টি কলেজ আছে। তন্মধ্যে কালকিনি কলেজের অবস্থা করুণ। এ কলেজটি প্রতিষ্ঠাকাল থেকেই বিভিন্ন সমস্যায় জর্জরিত। কলেজটিতে শিক্ষকের অভাব। এ উপজেলায় ২৯টি মাধ্যমিক বিদ্যালয়, ৮টি জুনিয়র বিদ্যালয়, ১১৩টি প্রাথমিক বিদ্যালয় ও ৬৪টি মাদ্রাসা আছে। এ সব স্কুল ও মাদ্রাসাগুলো বিভিন্ন সমস্যায় জর্জরিত।

স্বাস্থ্য
উপজেলায় ১টি স্বাস্থ্যকেন্দ্র ও ৭টি পরিবার পরিকল্পনা ও মাতৃমঙ্গল কেন্দ্র আছে। উপজেলা স্বাস্থ্যকেন্দ্রটি নামেমাত্র। আধুনিক চিকিৎসা দেয়ার জন্য কোন যন্ত্রপাতি নেই। পানি ও ওষুধের অভাব। প্রয়োজনের তুলনায় বেড সংখ্যা কম। জীবনরক্ষাকারী ওষুধ একেবারেই নেই। তাই গরীব রোগীদেরকে বাজার থেকে ওষুধ কিনতে হয়।

যোগাযোগ

যোগাযোগ ব্যবস্থা এ উপজেলায় খুব খারাপ। ১৮০ মাইল রাস্তার মধ্যে মাত্র ৮ মাইল রাস্তা পাকা। বাকী ১৭২ মাইল রাস্তা কাঁচা। উপজেলা সদরের সাথে ১৫টি ইউনিয়নের যোগাযোগ ব্যবস্থা অত্যন্ত খারাপ।

কৃষি

এ উপজেলা কৃষির দিক দিয়ে পশ্চাদপদ। বিদ্যুতের অভাবে কৃষককুল সেচকার্য থেকে বঞ্চিত। ৫০ হাজার ৫শ' একর জমি আবাদী ও ১৭ হাজার ৮শ' একর জমি অনাবাদী। বেশীরভাগ কৃষকই গরীব। ফলে মওসুমের সময় প্রয়োজনীয় বীজ ও সার সংগ্রহ করতে না পারায় প্রতিবছরই উৎপাদন হ্রাস পাচ্ছে। সেচের জন্য ২৬২টি শক্তিশালিত নলকূপ, ১৩টি অগভীর নলকূপ রয়েছে। মওসুমের অধিকাংশ সময় নলকূপ বন্ধ থাকে।

হাট-বাজার

উপজেলায় হাট-বাজারের সংখ্যা ৩১টি। উপজেলায় হাটগুলোর অবস্থা করুণ। হাটের ছাউনী নেই। বর্ষা আসলে লোকজন ভিজে একাকার হয়ে হাট-বাজার করে। হাটে যাতায়াতের রাস্তাগুলোও খারাপ।